



Balsafar Roy, est puny pour auoir prophané les vaisseaux du Temple en vn banquet.

LE Roy Balsafar fils de Nabuchodonosor, fit vn grand conuie aux nobles de sa Cour, qui s'y trouerent en nombre d'environ mille, où tous beurent d'autant, & iusqu'à s'enyrer. Lors le Roy fit apporter tous les vaisseaux d'or, que son pere auoit pillé au Temple de Ierusalem, dans lesquels chacun beur, mesmes les concubines du Roy, & ce avec loüange de leurs Dieux d'or, d'argent, d'airain, de fer, de bois & de pierre. Au mesme instant s'apparut vne main qui écriuoit contre la paroy; dont le Roy troublé & tremblant, fit venir quelques-uns de ses Magiciens pour lire & interpreter ce qui auoit esté escrit, promettant à celuy qui luy en donneroit l'intelligence, vn collier d'or, & vn vestement de pourpre, mais nul ne luy püst expliquer. Sur ce, la Reyne dit au Roy, qu'il y auoit vn ieune homme nommé Daniel, accompli en toute perfection & science, lequel se presenta deuant sa Majesté, & refusa les dons à luy offerts, disant: Sire, ton pere auoit esté élevé de Dieu en toute magnificence, & s'est oublié tellement, que Dieu l'a réduit à manger le foin entre les bœufs & asnes sauvages: & ce, iusqu'à ce qu'il reconnut que le Souuerain auoit puissance sur tous Royaumes. Aussi toy qui est son fils, tu n'as point humilié ton cœur, combien que tu sceusse toutes ces choses, ains t'es élevé contre le dominateur du Ciel, prophanant ses vaisseaux, & loüant seulement tes Dieux terrestres, ouirage de tes mains. Or est cet écriteau tel; *Manè, Thecel, Phares*, c'est à dire; *Manè*, Dieu a nommé ton Royaume, & l'a accompli; *Thecel*, Tu as esté mis en balance, & as esté trouué en auoir le moins; *Phares*, Ton Royaume est diuisé, & donné aux Medes, & aux Perses. Et cette nuit mesme Balsafar fut occis, & Darius luy succeda.

Daniel 5. Chap.